

摘藻堂四庫全書薈要

集部

欽定四庫全書薈要卷一萬五千四百九十七

集部

劔南詩藁卷七

宋 陸游 撰

題明皇幸蜀圖

天寶政事何披猖使典相國東平王弄權楊李不足怪
阿瞞手自裂紀綱八姨富貴尚有理何至詔書褒五郎

天寶末下詔雪
張易之兄弟

盧龍賊騎已洶洶丹鳳神語猶琅琅人

知大勢危索卯天稔奇旣如崩牆臺省諸公獨耐事歌

詠功德卑虞唐一朝殺氣橫天未足馬西奔幾不脫向
來謫子知幾人賊前稱臣草間活劒南萬里望秦天行
殿春寒聞杜鵑老臣九齡不可作魚蠹蛛絲金鑑篇

春寒連日不出

海棠花入燕泥乾梅子枝頭已帶酸老去嬾尋年少夢
春分不減社前寒著書敢望垂千載嗜酒猶須隱一官
正是閒時無客過小庭斜日倚闌干

馬上偶成

城南城北紫遊韁盡日間行看似忙刺水離離葛葉短
連村漠漠豆花香夕陽有信催殘角春草無情上繚牆
我亦人間倦遊者長吟聊復愴興亡

夜宴

酒浪搖春不受寒燭花垂燼忽堆盤山川路邈人將老
絲管聲遒夜向闌四海交朋更聚散百年光景雜悲歡
自憐病眼猶明在更把名花半醉看

是夕得范希元家
晚海棠數枝繁麗

一城
所無

觀音院讀壁間蘇在廷少卿兩小詩次韻

揚鞭莫出錦官城
小院無僧有月明
不信道人心似鐵
隔城猶送擣衣聲

又

老去癡頑不受鑄
姓名身後更須傳
世間商略無歸處
只合長齋繡佛前

錦亭

天公為我齒頰計
遣飫黃甘與丹荔
又憐狂眼老更狂

令看廣陵芍藥蜀海棠周行萬里逐所樂天公於我元
不薄賢人不出長安城寶帶華纓真汝縛樂哉今從石
湖公大度不計聲承聲夜宴新亭海棠底紅雲倒吸玻
璃鍾琵琶絃繁腰鼓急盤鳳舞衫香霧溼春醪凸盞燭
光搖素月中天花影立遊人如雲環玉帳詩未落紙先
傳唱此邦句律方一新鳳閣舍人今有樣

晚起

新晴窗日弄春妍幌小屏深意自便長恨病多妨痛飲

却緣客少得安眠
雛鶯故故啼簷角
飛絮翩翩墮枕前
欲著衣裳還嬾起重
尋殘夢一悠然

雨

映空初作繭絲微
掠地俄成箭鏃飛
紙帳光遲饒曉夢
銅鑪香潤覆春衣
池魚鱗鱗隨溝出
梁燕翩翩接翅歸
惟有落花吹不去
數枝紅溼自相依

春晚書懷

萬里西遊為覓詩
錦城更付一官癡
脫巾漉酒從人笑

拄笏看山頗自竒
疎雨池塘魚避釣
曉鷺窗戶客爭基
老來怕與春為別
醉過殘紅滿地時

出朝天門繚長堤至劉侍郎廟由小西門歸

曉從北郭過西城
十里沙堤似席平
澹日向人供帽影
微風傍馬助鞭聲
歡情寂寂隨年減
俗事紛紛逐日生
到處每求佳水竹
晚途牢落念歸耕

夜分讀書有感

光陰百歲已中分
擬結茅茨老白雲
萬里誰憐新卧疾

九重猶記舊能文枕邊得句題屏疊馬上看山隔帽羣
終恨無勞縻廩粟夜窗聊策讀書勲

中夜聞大雷雨

雷車駕雨龍盡起電行半空如狂矢中原風塵五十年
上帝震怒初一洗黃頭殘寇褫魂魄面縛軍門爭請死
已聞三箭定天山何啻積甲齊熊耳捷書馳騎奏行宮
近臣上壽天顏喜閤門明日催賀班雲集千官摩劍履
長安父老請移蹕願見六龍臨渭水從今身是太平人

敢憚安西九千里

春殘

石鏡山前送落暉，春殘回首倍依依。
時平壯士無功老，鄉遠征人有夢歸。
苜蓿苗侵官道合，蕪菁花入麥畦稀。
倦遊自笑摧頽甚，誰記飛鷹醉打圍。

武擔東臺晚望

顚顚西窗已一翁，登高意氣尚豪雄。
關河霸國興亡後，風月詩人醉醒中。
病起頓驚雙鬢改，春歸一掃萬花空。

欄邊徙倚君知否直到吳天目未窮

行武擔西南村落有感

騎馬悠然欲斷魂
春愁滿眼與誰論
市朝遷變歸蕪沒
礪谷訶訶互吐吞
一徑松楠遙見寺
數家雞犬自成村
最憐高冢臨官道
細細煙莎遍燒痕

有大家高數丈旁又一家差小莫知

何代人也俗號太子墓

小飲房園

宦遊到處即忘家
況得閒身管物華
疎索故人緣病酒

折除厚祿為看花泥新高棟初巢鷺萍匝荒池已集蛙
斟酌人生要行樂燈前起舞落烏紗

飲昭覺寺抵莫乃歸

身墮黃塵每慨然攜兒蕭散亦前緣聊憑方外巾盂淨
一洗人間七箸羶靜院春風傳浴鼓畫廊晚雨溼茶煙
潛光寮裏明窗下借我消搖過十年

自芳華樓過瑤林莊

春晚江邊草過腰雨餘樓下水平橋名花未落如相待

佳客能來不費招
欄角峭風羅袖薄
柳陰斜日玉驄驕
此身醉死元關命
敢笑聞雞趁早朝

書懷

詩不能工浪得窮
幾年衮衮看諸公
摧頽已作驥伏櫪
留滯敢嫌船逆風
消日劇棊疎竹下
送春爛醉亂花中
倚樓看鏡俱癡絕
羸取煙蓑伴釣翁

遊東郭趙氏園

清晨呼馬出馭吏
請所之錦城浩如海
我亦無與期有

花即入門莫問主人誰下馬據胡牀傲睨忘訶譏人言
白頭翁胡為尚兒癡老翁故不癡借花發吾詩詩句帶
花香東風不敢吹徘徊雙蛺蝶許汝鼻端知

卜居

歷盡人間行路難老來要覓數年間供家米少因添鶴
買宅錢多為見山池面紋生風細花根土潤雨斑斑
借春乞火依隣里剩釀村醪約往還

又

南浮七澤弔沈湘西沂三巴掠夜郎自信前緣與人薄
每求寬地寄吾狂雪山水作中濡味蒙頂茶如正焙香
儻有把茅端可老不須辛苦念還鄉

馬上

春殘馬上意悵悵縱轡微吟過數坊綠樹成帷連藥市
清流如帶繞毬場城荒鼓角增悲壯苑廢雲煙尚莽蒼
堪笑年來向詩嬾還家古錦只空囊

夜登江樓

平生胸中無滯留
曠然獨與造物遊
天風駕我周寓縣
夜半忽過江邊樓
樓前茫茫天地濶
萬頃月浸空江秋
雲階無塵鸞鶴舞
玉笛裂石魚龍愁
肺肝澄澈納灝氣
毛髮慘慄臨寒流
世間回首真一夢
誰能更念酬恩讎

書歎

早得虛名翰墨林
謝歸忽已歲時侵
春郊射雉朝盤馬
秋院焚香夜弄琴
病酒閉門常兀兀
哦詩袖手久恹恹
浮沉不是忘經世
後有仁人識此心

三月一日府宴學射山

此出昇仙路少東據鞍自笑老從戎
百年身世酣歌裏千古功名感慨中
天遠僅分山髣髴霧收初見日瞳矐
橫空我欲江湖去誰借冷然禦寇風

對酒

閒愁如飛雪入酒即消融
好花如故人一笑盃自空
流鶯有情亦念我柳邊盡日啼
春風長安不到十四載酒徒
往往成衰翁九環寶帶光照地
不如畱君雙頰紅

題直舍壁

文書那得廢哦詩羞作羣兒了事癡付與後人評此老
一丘一壑過元規

遊園覺乾明祥符三院至莫

成都再見春事殘雖名閒官實不閒門前車馬鬧如市
案上文檄高於山有時投鐔輒徑出畧似齊客偷秦關
日斜僕夫已整駕顧景欲駐愁嘲訕豈知今朝有此樂
放浪一笑開衰顏抽身黃塵烏帽底得意翠木清泉間

寨裳危磴窮犖确洗耳古澗聽淙潺豈惟頓覺宇宙廣
政爾一散腰脚頑似聞青城縹緲處待我歸綴仙官班
俊鷹解條即萬里豈比倦翼方知還

遊合江園戲題

朱朱白白池臺間好風妍日開未殘我來覓醉苦草草
常恨不如花意閒山雞飛起亂花落下上青林穿翠壑
世間動步即有拘常恨不如禽意樂人言功名恐不免
我願徜徉娛歲晚熟計淫書理白魚何如縱獵牽黃犬

成都四郊如砥平安得雙韃馳出城鞚飛塵起望不見
從騎尋我鳴鶻聲

三月十六日作

石筍街西風景幽醉眠萬事付悠悠倦遊我已七年客
促駕春無三日畱枝上蝶稀紅藥老舍中蠶起綠桑柔
功名墮甌誰能問羞作飢鷹夜掣韝

食薺

日日思歸飽薺薇春來薺美忽忘歸傳誇真欲嫌荼苦

自笑何時得瓠肥

又

采采珍蔬不待畦中原正味壓蓴絲挑根擇葉無虛日
直到開花如雪時

又

小著鹽醃助滋味微加薑桂發精神風爐歛鉢窮家活
妙訣何曾肯授人

次韻范文淵

簞瓢氣已壓膏粱不傍朱門味更長細看高人忘寵辱
始知吾輩可憐傷巖扃勾漏新丹竈香火匡廬古道場
剩欲與君堅此約它年八十鬢眉蒼

近有術者言僕壽過八十

題醉中所作草書卷後

胷中磊落藏五兵欲試無路空崢嶸酒為旗鼓筆刀槊
勢從天落銀河傾端溪石池濃作墨燭光相射飛縱橫
須臾收卷復把酒如見萬里煙塵清丈夫身在要有立
彼哉運盡行當平何時夜出五原塞不聞人語聞鞭聲

登子城新樓遍至西園池亭

狂夫無計奈狂何，何況登臨逸興多。
千疊雪山連滴博，一支春水入摩訶。
吟餘騎省霜侵鬢，釣罷玄真雨滿蓑。
逐寇榆關期尚遠，不妨隨處得婆娑。

小疾謝客

小疾深居不喚醫，消搖更覺勝平時。
癡人未害看周易，名士真須讀楚辭。
綠徑風斜花片片，畫廊人靜雨絲絲。
晚來頓覺清羸甚，自置篝爐煮粟糜。

歸耕

隨牒人間鬢欲疎
歸耕且復補東隅
甑炊地確新春米
衣拆天吳舊繡圖
有圃免煩官送菜
叩門翻喜吏徵租
不愁問字無來客
惟欠揚雄宅一區

聞孫巖老挂冠歎仰之餘輒賦長句

聖賢在世龍行天
出處何至為物牽
後人競作駒伏轅
未死奄奄如九泉
郗孫公者山澤僊
巖巖玉骨寒入肩
哦詩調苦亂嘒蟬
燥墨瘦字醜不妍
諸公好之攬使前

六丁力盡山嶷然奏書告老不待年脫手徑上岷山顛
吾儕一官自糾纏俛首鞭箠不自憐彊欲作詩誦公賢
事偉辭卑難並傳

松驥行

驥行千里亦何得垂首伏櫪終自傷松閱千年棄澗壑
不如殺身扶明堂士生抱材願少試擔取燕趙歸君王
閉門高卧身欲老聞雞相蹴涕數行正令咿嚶死牀簣
豈若橫身當戰場半酣浩歌聲激烈車輪百轉盤愁腸

遣興

鶴料無多又掃空今年真是浣花翁
放教綠酒關身事畱得朱顏在鏡中
挾彈園林芳徑雨投竿窗檻小溪風
癡頑自笑歸何日家在東吳更向東

野意

小東門外曳筇枝白葛烏紗自一奇
閒客逍遙無吏責茂陰清潤勝花時
茶經每向僧窗讀菰米仍於野艇炊
便覺眼邊歸路近鏡湖禹廟見參差

雨中登安福寺塔

俗謂之黑塔

平生喜登高醉眼無疆界北顧極幽并東望跨海岱喟
然撫手歎從古幾成敗英雄如過鳥城郭但遺塊今朝
上黑塢千里曠無礙忽驚風霆掣坐覺天地晦急雨挾
龍腥溽暑為摧壞皇天念蟠鬱令我寄一快那知書生
狂自倚心眼大更思駐潼關黃河看如帶

過野人家有感

縱轡江皋送夕暉誰家井臼映荆扉隔籬犬吠窺人過

滿箔蠶飢待葉歸

吳人直謂桑曰葉

世態十年看爛熟家山萬

里夢依稀躬耕本是英雄事老死南陽未必非

幽居晚興

借鉏斲藥喜微香汲井澆花趁晚涼
曾次何曾橫一物尊前尚欲笑千場
錦江秋雨芙蓉老笠澤春風杜若芳
歸去自佳畱亦樂夢中何處是吾鄉

飲保福

筵雨雲低未放晴
閉門作病憶閒行
攝衣丈室參耆宿

曳杖長廊喚弟兄飽飯即知吾事了
免官初覺此身輕
歸來更欲誇妻子學煮雲堂芋糝羹

觀華嚴閣僧齋

閣下自四月初至七月末日飯僧數千人

拂劍當年氣吐虹
喑鳴坐覺朔庭空
早知壯志成癡絕
悔不藏名萬衲中

閒中偶題

楚澤巴山歲歲忙
今年睡足向禪房
只知閒味如茶永
不放羈愁似草長
架上漢書那復看
牀頭周易亦相忘

客來拈起清談麈且破西窗半篆香

又

久矣雲衢斂羽翰退飛更覺一枝安七千里外新聞客
十五年前舊史官花底清歌春載酒江邊明月夜投竿
癡頑直為多更事莫怪胷懷抵死寬

病中戲書

五十忽過二流年消壯心避人便小疾移竹喜微陰洗
甕閒筍酒焚香靜斲琴鏡中青鬢在切莫遣愁侵

又

微疾餘災時須藥裏開禽驚杵聲去蜂認蜜香來閉
戶知長日全生幸散材晚涼幽興動彊到竹邊回

又

食筍動衰疾清羸逾兩旬藥囊隨卧起詩句雜吟呻架
足書籤蠹窗凝酒榼塵免從官乞假且喜是閒身

病起書懷

病骨支離紗帽寬孤臣萬里客江干位卑未敢忘憂國

事定猶須待闔棺
天地神靈扶廟社
京華父老望和鑾
出師一表通今古
夜半挑燈更細看

又

酒酣看劍凜生風
身是天涯一秃翁
捫蝨劇談空自許
聞雞浩歎與誰同
玉關歲晚無來使
沙苑春生有去鴻
人壽定非金石永
可令虛死蜀山中

寺樓月夜醉中戲作

素壁徐升天宇閒
連峰積雪蒼茫間
樓臺是處可見月

無此巉巖羣玉山

又

水精盞映碧琳腴
月下泠泠看似無
此酒定從何處得
判知不是文君壚

又

海山縹緲玉真妃
貪看冰輪不肯歸
樓上三更風露冷
旋圍步障換羅衣

晚過五門

五門路四月乳鴉啼綠樹閒遊但喜日初長薄暑始知
春已去樓頭風高舞雙旗畫角聲中日還莫馬蹄特特
無斷時老盡行人路如故

躬耕

莫笑躬耕老蜀山也勝菜把仰園官喚回癡夢塵機息
空盡閒愁酒地寬無復短衣隨李廣但思微雨過蘇端
十年世事茫如海輸與閒人靜處看

晚興

老病愁趨畫戟門
天教高卧浣花村
山林獨往雜屠釣

世界皆空誰怨恩

禪祕要經言觀空之法自一城一國一世界至三千大千世界皆空 千

卷蠹書忘歲月一尊濁酒信乾坤
興來倚杖清江上斷角疎鐘正歛昏

夏夜大醉醒後有感

少時酒隱東海濱
結交盡是英豪人
龍泉三尺動牛斗
陰符一編役鬼神
客遊山南夜望氣
頗謂王師當入秦
欲傾天上河漢水
淨洗關中兵甲塵
那知一旦事大繆

騎驢劒閣霜毛新却將覆氊草檄手小詩點綴西州春
素心雖願老巖壑大義未敢忘君臣雞鳴酒解不成寐
起坐肝膽空輪囷

合江夜宴歸馬上作

零露中宵溼綠苔江郊縱飲亦荒哉引盃快似黃河瀉
落筆聲如白雨來纖指醉聽箏柱促長檠時看燭花摧
頭顱自揣應虛死馬上長歌寄此哀

齋居書事

慵養金丹換鬢鬚微霜正要稱清癯平生風露充蟬腹
到處雲山寄鶴軀道室焚香勤守白虛窗點易靜研朱
自知世事難諧偶不待幽人夜見呼

午夢

苦愛幽窗午夢長此中與世暫相忘華山處士如容見
不覓仙方覓睡方

江瀆池納涼

雨過荒池藻荇香月明如水浸胡牀天公作意憐羈客

乞與今年一夏涼

晚步

屏居無俗事薄莫行溪園斷續風蟬噪俯仰露葉翻
月出照西壁參差見簷痕新沐嬾不櫛清冷入髮根
臨流揮羽扇對月傾芳尊寄謝南昌尉何必隱市門

姚將軍靖康初以戰敗亡命建炎中下詔求之不可
得後五十年乃從呂洞賓劉高尚往來名山有見之者
予感其事作詩寄題青城山上清宮壁間

將軍儻見之乎

造物困豪傑意將使有為功名未足言或作出世資姚
公勇冠軍百戰起西陲天方覆中原殆非一木支脫身
五十年世人識公誰但驚山澤間有此熊豹姿我亦志
方外白頭未逢師年來幸廢放儻遂與世辭從公遊五
嶽稽首餐靈芝金骨換綠髓欬然松杪飛

客自鳳州來言岐雍間事悵然有感

表裏山河古帝京花門數盡固當平千門未報甘泉火

萬耦方觀渭上耕前日已傳天狗墮

去年十一月天狗墮長安聲甚大

今年寧許佛狸生會須一洗儒酸態獵罷南山夜下營

席上作

綠波畫漿浣花船清簟疎簾角黍筵一幅葛巾林下客
百壺春酒飲中仙散懷絲管繁華地寄傲江湖浩蕩天
浮世升沈何足計丹成碧落珥貂蟬

青城山中有孫太古畫碧落侍中范

長生舉手整貂蟬像特妙

水亭偶題

涼榭閒拈玉笛吹十年疎放負明時溝中木斷誰曾問
空裏蓬征自不知金井梧桐生晝寂綠池蘋藻弄風漪
人生行樂從來事此理何須更細推

避暑江上

苦熱厭城市初夜臨江湍風從西山來頗帶積雪寒堰
聲靜尤壯噴薄如急灘頓遠車馬喧更覺衣裳單斷岸
吐缺月恨不三更看且隨螢火歸城扉欲橫關

夏白紵

并序

古有四時白紵亦有止作一時者丙申五月在成都烈暑可畏戲作夏白紵二首

雲母屏薄望如空水精簾疎不礙風美人獨立何所似
白玉芙蓉秋水中素綃細織冰蠶縷清寒不受人間暑
晚來浴罷綠窗間自把新詩教鸚鵡

又

翔鸞矯矯離風塵眼明見此絕代人紗窗弄筆消永日
臨得黃庭新逼真飛樓縹緲今何夕月與玉人同一色

下簾不為九霄寒自要玲瓏看團壁

久旱忽大雨涼甚小飲醉眠覺而有作

暑雨蕭蕭滴夜長曉窗探借九秋涼
金荷淺酌閒傳酒銀葉無煙靜炷香
舒雁且為賒死計鳴鳩便欲策勲忙
散人亦未全無事枕藉琴書滿一牀

明日開霽益涼復得長句

睡起東窗照眼明朝陽爛漫作新晴
已聞雨斷空階滴更覺風從細葛生
蛺蝶飛來停酒榼石榴飄落糝棋枰

四時好處閒方覺不枉今年住錦城

夜讀東京記

海東么麼辜復冒敢據神州竊名號幅員萬里宋乾坤
五十一年讎未報煌煌藝祖中天業東都實宅神明隲
即今蛇豕穴宮殿安得旄頭下除掃寶玉大弓久不獲
臣子義敢忘巨盜景靈太廟威神在北鄉慟哭猶可告
壯士方當棄軀命書生詎忍開和好孤臣白首困西南
有志不伸空自悼

感事

青鬢當時映綠衣
堯功曾預記巍巍
玄都春老人何在
華表天高鶴未歸
流輩凋疎情話少
年光遲莫壯心違
倚樓不用悲身世
倦鷁無風亦退飛

書歎

三代藏寶器世守參河圖
埋湮則已矣可使列市區
文章有廢興蓋與治亂符
慶厯嘉祐間和氣扇大鑪
數公實主盟渾灝配典謨
開闢始歐王菑畬逮曾蘇
大駕初

渡江奔隨繁有徒吾猶及故老清夜陪坐隅論文有脉
絡千古著不誣俯仰四十年綠髮霜蓬枯孤生尊所聞
秉節不敢渝久幽士固有速售理則無世方亂珉玉吾
其老江湖

睡起

睡味清酣鼻息輕碧幙文簾喜涼生片雲過處失簾影
急雨來時聞瓦聲黠寇尚憑三輔險散關未下九天兵
白頭漫倚詩豪在手掣鯨魚意未平

飯罷碾茶戲書

江風吹雨暗衡門
手碾新茶破睡昏
小餅戲龍供玉食
今年也到浣花村

夢遊山水奇麗處有古宮觀云雲臺觀也

神遊忽到雲臺宮
太華彩翠明秋空
曲廊下闕白蓮沼
小閣正對青蘿峯
林間突兀見古碣
雲外縹緲聞疎鐘
褐衣紗帽瘦如削
遺像恐是希夷翁
窮搜未遍忽驚覺
半窗朝日初瞳矐
却思巉然五千仞
可使常墮沙塵中

小臣昧死露肝鬲願扈鑾駕臨峻潼何當真過此山下
百尺嫋嫋龍旗風

月下醉題

黃鵠飛鳴未免飢此身自笑欲何之閉門種菜英雄老
彈鋏思魚富貴遲生擬入山隨李廣死當穿冢近要離
一樽彊醉南樓月感慨長吟恐過悲

野外劇飲示坐中

悲歌流涕遣誰聽酒隱人間已半生但恨見疑非節俠

豈忘小忍就功名江湖舟楫行安往燕趙風塵久未平
飲罷別君攜劍起試橫雲海翦長鯨

與青城道人飲酒作

君不見太傅晚歲具海舟歸欲極意東山遊翰林偶脫
夜郎謫大醉賦詩黃鶴樓兩公窮達何足道同是逸氣
橫清秋我無一事行萬里青山白雲聊散愁有酒不換
西涼州無酒不典鸛裘不作王猛傲睨坐捫蝨不作
甯戚悲歌起飯牛五雲覆鼎金丹熟笙鶴飄然戲十洲

銅壺閣望月

銅壺閣上看明月身在千尋白銀闕十年肺渴今夕平
皓然宵次堆冰雪恨無僊掌出雲表更取墜露和玉屑
夜闌三歎下危梯明日人間火雲熱

連日得雨涼甚有作

九淵龍起跨蒼茫聊為西州洗亢陽曉看空濛知歲稔
夜聞點滴覺心涼紗幮不下蚊蠅靜焙火微溫書畫香
睡足何須雲夢澤如雷鼻息撼隣牆

待青城道人不至

我亦從來薄世緣偶然采藥到西川
慵追萬里騎鯨客且伴千年化鶴僊
金鼎養丹噉海日玉壺取酒醉江天
朝來坐待方平久讀盡黃庭內外篇

劍客行

我友劍俠非常人袖中青蛇生細鱗
騰空頃刻已千里手決風雲驚鬼神
荆軻專諸何足數正畫入燕誅北部
一身獨報萬國讎歸告昌陵淚如雨

夜宴即席作

宣華輦路牧牛羊摩訶龍池草茫茫
宮殿犁盡餘繚牆南風遠吹禾黍香
草間白骨橫秋霜何由喚起醕一觴
癡人走死聲利場我獨感此惜流光
蘋花開時風榭涼美人縹緲如鸞翔
堯年舜日樂未央非子之故為誰狂
宿沱江彌勒院

雨足陂塘溢庭空艸樹荒
衰年愁客路野寺憩衣囊
蛙吹喧孤枕蚊雷動四廊
青燈照無寐寂寞數更長

學射道中感事

學射山前宿雨收
籃輿咿軋自生愁
得閒何惜傾家釀
漸老真須秉燭遊
道廢尚書猶乞米
時來校尉亦封侯
自憐白首能豪在
車轍何因遍九州

遊學射觀次壁間詩韻

走遍人間鬢尚青
爾來樂事滿餘齡
傍潭秋爽鉏甘菊
登嶽春暄采茯苓
閒倚松蘿論劒術
靜臨窗几勘丹經
嚴光本是逃名者
安用天文動客星

昇僊橋過風雨大至憩小店

觸熱真疑墮火灰
雨如飛鏃亦佳哉
空江魚鼈從龍起
平野雷霆擁馬來
正怪橫吹屋茅盡
俄聞下擊澗松摧
晚來日漏風猶急
卧看柴扉闔復開

龍挂

成都六月天大風
發屋動地聲勢雄
墨雲崔嵬行風中
凜如鬼神塞虛空
霹靂迸火射地紅
上帝有命起伏龍
龍尾不卷曳天東
壯哉雨點車軸同
山摧江溢路不通

連根拔出千尺松未言為人作年豐偉觀一洗芥蒂胃
芳華樓夜宴

射虎將軍老不侯尚能豪縱醉江樓笙歌雜沓娛清夜
風露高寒接素秋少日壯心輕玉塞莫年幽夢墮滄洲
人間清絕沅湘路常笑靈均作許愁

遣興

老子從來薄宦情不辭落魄錦官城生前猶著幾兩屐
身後更須千載名樓外雪山森曉色井邊風葉戰秋聲

一尊尚有臨卣酒却為無憂得細傾

卣州宇文吏部餉酒絕佳

六月九日夜步月至朝真觀

朝斗真人有舊祠追涼老子曳筇枝從來步月難為客
此夕聽琴合有詩竹院沈沈聞漏永玉繩耿耿看星移
慇懃更作重來約迨及冰輪未缺時

十日夜月中馬上作

身遊碧海跨鯨魚心似寒冰貯玉壺衣溼三更清露墜
眼明萬里片雲無橫空孤鶴曾相識披髮飛僊定可呼

老向人間無復意，逝將從此謁清都。

百歲

百歲紛紛易白頭，一年鼎鼎又清秋。
壯心空似驥伏櫪，病骨敢懷狐首丘。
屠釣論交成酒隱，山林高卧得天遊。
莫悲晚節功名誤，即死猶堪贈醉侯。

獨飲醉卧比覺已夜半矣戲作此詩

澤畔元非慕獨醒，椒人一飲費經營。
也知世少蘇司業，安得官如阮步兵。
醉著面顏驚少壯，澆餘胃次失崢嶸。

更闌莫厭殘燈火卧聽空廊絡緯聲

蒙恩奉祠桐柏

少年曾綴紫宸班晚落危途九折艱
罪大初聞收郡印恩寬俄許領家山
羈鴻但自思煙渚病驥寧容著帝閑
回首觚稜渺何處從今常寄夢魂間

和范待制月夜有感

榆枋正復異鵬飛等是垂頭受馬鞵
坐客笑談嘲遠志故人書札寄當歸
醉思蓴菜黏篙滑饒憶鱸魚墜釣肥

誰遣賢人同此感夜來風月夢苔磯

和范待制秋興

策策桐飄已半空
啼蜚漸覺近房櫳
一生不作牛衣泣
萬事從渠馬耳風
名姓已甘黃紙外
光陰全付綠尊中
門前剥啄誰相覓
賀我今年號放翁

又

睡臉餘痕印枕紋
秋衾微潤覆爐熏
井桐搖落先霜盡
衣杵淒涼帶月聞
佛屋紗燈明小像
經奩魚蠹蝕真文

身如病驥惟思卧誰許能空萬馬羣

又

山澤沉冥氣尚豪鬚絲未遽歎蕭騷已忘海運鯤鵬化
那計風微燕雀高萬里客魂迷楚峽五更歸夢隔胥濤
故知有酒當勤醉自古寧聞死可逃

和范待制秋日書懷二首游自七月病起蔬食止
酒故詩中及之

閒窗貝葉對旁行不覺城笳報夕陽嗜酒步兵猶未達

拂衣司諫亦成忙。室無摩詰持花女。囊有婆娑等價香。
欲與衆生共安隱。秋來夢不到鱸鄉。
陳文惠公松江詩云西風斜日鱸魚鄉傳本或誤作香字張文潛嘗辨之

又


故人無字寄相思。敢向窮途怨不知。老病已全惟欠死。
貪嗔雖斷尚餘癡。數莖雪鬢江湖遠。九轉金丹日月遲。
畬粟山苗俱可飽。明年東去隱峨眉。

劔南詩豪卷七

謹案卷六第十一頁前一行遺宅尚有高人家刊
本尚訛上據唐宋詩醇改

第二十五頁後五行僵卧獨聽宮門鐘按唐宋詩
醇僵作偃

[illegible]



總校官庶吉士臣張能照

校對官編修臣楊壽楠

謄錄監生臣戴垓

欽定四庫全書薈要

集部

劔南詩藁卷八

詳校官助教臣謝登雋



欽定四庫全書薈要卷一萬五千四百九十八

集部

劔南詩豪卷八

宋 陸游 撰

遊學射山遇景道人

肩輿適青郊飛屐登翠麓餘霜未泣瓦晨日初掛木推
門覓黃冠避客似犇鹿雖無與晤語清坐意亦足豈知
逢此士曠度超世俗欣然同一笑齒頰粲冰玉探囊贈
奇艸甘香勝芎藭試臨清鏡照衰髮森已綠出門恣幽

討老僊有遺躅丹竈雖已空藥丸遍山谷嗟予迫遲莫
冠蓋厭追逐結茅遠人境此計亦已熟若人真我友玉
字當共讀客來不知處雞犬望雲屋

城東醉歸深夜復呼酒作此詩

冬夜走馬城東回追風逐電何雄哉五門鼓動燈火鬧
意氣忽覺如章臺歸來脫靴靴滿霜月明如水浸野堂
梅花滿手不可負催熾獸炭傳清觴書生所懷未易料
會與君王掃燕趙只愁漸老不禁寒臥載輜車君勿笑

融州寄松紋劍

十年學劍勇成癖，騰身一上三千尺。
術成欲試酒半酣，直躡丹梯削青壁。
青壁一削平無蹤，浩歌却過蓮花峯。
世人仰視那得測，但怪雪刃飛秋空。
老魅畏誅奉約束，假息漁陽連上谷。
願聞下詔遣材官，恥作腐儒常碌碌。

歲晚

歲晚城隅車馬稀，偷閒聊得掩荆扉。
征蓬滿野風霜苦，多稼連雲雁鶩肥。
報國有心空自信，結茅無地竟安歸。

浣花道上人誰識華表千年老令威

玉京行

觀煉丹作

玉京清都奉紫皇赤明開皇劫茫茫有路坦如馳康莊
惜哉背之趨死鄉絳陵朱兒朝吐光森然箭鏃攢玉牀
潔齋山棲祓不祥朝餐夕食芝朮香縹囊藥笈出祕方
日精月華鍊陰陽爐開沐浴時日良清夜玉杵聞琳房
服之乃圭換肝腸三十六帝參翱翔下視一笑爭奪場

累累枯冢壓北邙

步出萬里橋門至江上

久坐意不懌掩卷聊出遊一節吾事足安用車與騶浮
生了無根兩踵蹋百州常憶航巨海銀山卷濤頭一日

新雨霽微茫見流求

在福州泛海東望見流求國

西行亦足快縱獵

南山秋騰身刺猛虎至今血濺裘命薄每自笑校尉略
已侯短劔隱市塵浩歌醉江樓頗疑屠博中可與共奇
謀丈夫等一死滅賊報國讎徙倚萬里橋寒日墮前洲

晚步

院荒有古意僧少無人聲徘徊楠陰下賞此落日明著
書亦何急寂寞身後名今年復止酒歌舞陳空觥不如
且消搖出門隨意行看竹入廢園望江上高城纖纖素
月出靄靄蒼煙橫此夕當復竒緱山吹玉笙

數日寒頓減頗有春意感懷賦短歌

微陰寒不力破臘春暗動林梢報梅白水際聞鳥哢羈
鴻漸整翮一一勞目送應憐飛蓬客猶作浣花夢平生
江淮間裘馬事豪縱豈知老畏死齋鉢受蔬供忍饒每

自笑小飲未敢痛何以慰寂寥臥聽壓春甕

春愁

春愁茫茫塞天地我行未到愁先至滿眼如雲忽復生
尋人似瘡何由避客來勸我飛觥籌我笑謂客君罷休
醉自醉倒愁自愁愁與酒如風馬牛

歲暮感懷

征塵十載暗戎衣虛負名山采藥期少日覆瓿曾艸檄
即今橫槊尚能詩昏昏殺氣秋登隴颯颯飛霜夜出師

會有英豪能共此鏡中未用歎吾衰

梅花

冰崖雪谷木未芽造物破荒開此花神全形枯近有道
意莊色正知無衰高堅政要飽憂患放棄何遽愁荒遐
移根上苑亦過計竹籬茅屋真吾家平生自嫌亦自許
妙處可識不可誇金樽翠杓未免俗篝火爲試江南茶

寺居夙興

閒居無一事睡少自夙興空庭翠霧合高樹紅日昇曳

杖遶四廊悄然不逢僧厨煙俄漠漠魚鼓亦登登晨粥
香滿堂梁肉坐可憎一作山在何許吾將買行滕

萬里橋江上習射

坡隴如濤東北傾胡牀看射及春晴風和漸減雕弓力
野迴遙聞羽箭聲天上攬槍端可落艸間狐兔不須驚
丈夫未死誰能料一寄他年下百城

關山月

和親詔下十五年將軍不戰空臨邊朱門沉沉按歌舞

廐馬肥死弓斷弦戍樓刁斗催落月三十從軍今白髮
笛裏誰知壯士心沙頭空照征人骨中原干戈古亦聞
豈有此輩傳子孫遺民忍死望恢復幾處今宵垂淚痕

出塞曲

佩刀一刺山爲開壯士大呼城爲摧三軍甲馬不知數
但見動地銀山來長戈逐虎祁連北馬前曳來血丹臆
却回射雁鴨綠江箭飛雁起連雲黑清泉茂艸下程時
野帳牛酒爭淋漓不學京都貴公子唾壺麈尾事兒嬉

戰城南

王師出城南塵頭暗城北五軍戰馬如錯繡出入變化
不可測紛紛戈甲塞中國虎狼雖猛那勝德馬前盟咿
爭乞降滿地縱橫投劒戟將軍駐坡擁黃旗遣騎傳令
勿自疑詔書許汝以不死股栗何爲汗如洗

讀書

面骨崢嶸鬢欲疎退藏只合臥蝸廬自嫌尚有人間意
射雉歸來夜讀書

又

歸老寧無五畝園讀書本意在元元燈前目力雖非昔
猶課蠅頭二萬言

時方讀小
本通鑑

晚過保福

堂靜僧閒普請疎爐紅氍暖放參餘蓮花池上容投社
椰子身中悔著書茶試趙坡如潑乳芋來犀浦可專車
放翁一飽真無事擬伴園頭日把鋤

偶過浣花感舊遊戲作

憶昔初爲錦城客，醉騎駿馬桃花色。
玉人攜手上江樓，一笑鈎簾賞微雪。
寶釵換酒忽徑去，三日樓中香未滅。
市人不識呼酒仙，異事驚傳一城說。
至今西壁餘小草，過眼年光如電掣。
正月錦江春水生，花枝缺處小舟橫。
閒倚胡牀吹玉笛，東風十里斷腸聲。

夜讀唐諸人詩多賦烽火者，因記在山南時登城觀塞上傳烽追賦一首。

我昔遊梁州，軍中方罷戰。
登城看烽火，川迴風裂面。
青

熒並駱谷隱翳連鄠縣月黑望愈明雨急滅復見初疑
雲罅星又似山際電豈無酒滿尊對此不能嚙低頭愧
虎旅零落白羽箭何時復關中却照甘泉殿

平明出小東門觀梅

知心多別離慰眼易零落東風吹梅花爛漫照城郭晴
日千堆雪偏宜馬上看逢迎無幾日不惜犯春寒明年
花發時我在兩京道花香固無盡我亦未遽老脫帽髮
如漆看花心未灰平戎那得妨持酒會有詩傳劒外來

寺居睡覺

虛窗寂寂夜三更燈斂殘光避月明
老嬾只貪春睡美愧聞童子誦經聲

又

心地安平曉夢長忽聞魚鼓動修廊
披衣起坐清羸甚想像雲堂炷粥香

僧雜菜餌之屬
作粥名炷粥

樓上醉書

丈夫不虛生世間本意滅寇收河山
豈知蹭蹬不稱意

八年梁益凋朱顏三更撫枕忽大叫夢中奪得松亭關
中原機會嗟屢失明日茵席留餘潛益州官樓酒如海
我來解旗論日買酒酣博塞爲歡娛信手梟盧喝成采
牛背爛爛電目光狂殺自謂元非狂故都九廟臣敢忘
祖宗神靈在帝旁

醉題

裘馬清狂錦水濱最繁華地作閒人金壺投箭消長日
翠袖傳盃領好春幽鳥語隨歌處拍落花鋪作舞時茵

悠然自適君知否身與浮名若箇親

初春出遊

春風初來滿刀州江水照人如潑油犢車芳艸南陌頭
家家傾貲事遨遊萬里橋西繫黃驄爲君一登散花樓
半年長齋廢觥籌興來忽典千金裘小桃婀娜弄芳柔
紅蘭茁芽滿春洲壚邊女兒不解愁鬪艸纔罷還藏鉤
可憐世人自拘囚盡中乾坤舞蜉蝣百年苦短去日遒
問君安用萬戶侯

芳華樓夜飲

春風射雉苑城旁走馬還來入醉鄉
夜暖酒波搖燭焰舞回粧粉鑠花光
浮生一笑常難必此樂它年未易忘
莫作五陵豪俠看奚奴歸路有詩囊

又

結客追遊亦樂哉城南城北古池臺
香生赭汗連錢馬光溢金船撥雪醅
難覓長繩縻日住且憑羯鼓喚花開
一春政使渾無事醉到清明得幾回

東門外遍歷諸園及僧院觀遊人之盛

馬上哦詩畫醉鞭東城南陌去
翩翩微風颭水魚鱗浪
薄日烘雲卵色天
隔屋鳩鳴閒院落
爭門花簇小輜輶
病來久已疎杯酌
春物撩人又破禪

城東馬上作

古寺名園處處行
翩然南陌復東城
手柔弓燥獵徒喜
耳熱酒酣詩興生
月似有情迎馬見
鶯如相識向人鳴
摩挲病眼還三歎
猶擬中原看太平

又

割鮮藉艸醉春醪
仰看鳴鶻百尺高
杜老何妨希稷卨
孔明本自陋袁曹
邊頭挿羽無傳檄
篋裏盤鵬有舊袍
寄語長安衆年少
妓圍不似獵圍豪

丁酉上元

突兀毬場錦繡峯
遊人士女擁千重
月離雲海飛金鏡
燈射冰簾掣火龍
信馬隨車紛醉俠
賣薪買酒到耕農
今年自笑真衰矣
但覺憑鞍睡思濃

又

鼓吹連天沸五門
燈山萬炬動黃昏
美人與月正同色
客子折梅空斷魂
寶馬暗塵思輦路
釣船孤火夢江村
古來漫道新知樂
此意何由可共論

又

放翁也入少年場
一笑燈前未歇狂
翠袖成圍欺月冷
羶車爭道覺塵香
蠻酥點綴春風早
楚餌留連夜漏長
結騎莫辭侵曉色
昔人萬里看西涼

後陵

一作厚陵

永慶院在大西門外不及一里蓋王建

墓也有二石幢猶當時物又有太后墓琢石爲人

馬甚偉

陵闕淒涼俯舊邦恨流滾滾似長江穿殘已歎金鳬盡
缺落空餘石馬雙攬飯飢烏占寺鼓避人飛鼠上經幢
阿和乳臭崇韜耄堪笑昏童束手降

小飲趙園

少年結騎厭追歡漸老方知一笑難邂逅偶能成午醉

登臨未覺怕春寒
高林橫靄丹青幅
亂蝶爭花錦繡團
滿眼風光索彈壓
酒盃須似蜀江寬

和范舍人書懷

歲月如犇不可遮
即今楊柳已藏鴉
客中常欠尊中酒
馬上時看擔上花
末路淒涼老巴蜀
少年豪舉動京華
天魔久矣先成佛
多病維摩尚在家

和范舍人病後二詩末章兼呈張正字

放衙元不爲春醒
澹蕩江天氣未清
欲賞園花先夢到

忽聞簷雨定心驚香雲不動熏籠暖蠟淚成堆斗帳明
關隴宿兵讐未復祝公垂意在尊生

又

士生不及慶厯初下方元祐當勿疎請看蛟龍得雲雨
豈比烏雀馴階除舍人起視北門艸學士歸著東觀書
劒外老農亦吐氣釀酒畦花常晏如

江路見杏花

我行浣花村紅杏紅於染數樹照南陂一林藏北崦雖

慙嶺梅高繁麗豈易貶雨絲飛復止雲葉低未斂似嫌風
日緊護此燕脂點身閒得縱觀無語吾所歎

夜聞雨聲

高簷夜雨瀉淋浪起擁寒衾旋炷香春事豈堪頻破壞
客愁不可復禁當長蜚磊落輸郢釀輕騎聯翩報海棠
著意物華君莫笑世間得喪更茫茫

海棠

十里迢迢望碧雞一城晴雨不曾齊今朝未得平安報

便恐飛紅已作泥

又

蜀地名花擅古今一枝氣可壓千林
譏彈更到無香處
常恨人言太刻深

張園海棠

洛陽春信久不通
姚魏開落沙塵中
揚州千葉昔曾見
已歎造化無餘功
西來始見海棠盛
成都第一推燕宮
池臺掃除凡木盡
天地眩轉花光紅
慶雲墮空不飛去

時有絳雪縈微風蜂蝶成團出無路我亦狂走迷西東
此園低樹猶三丈錦繡却在青天上不須更著刀尺裁
乞與齊奴開步障

登劔南西川門感懷

自古高樓傷客情更堪萬里望吳京故人不見莫雲合
客子欲歸春水生瘡癘連年須藥石退藏無地著柴荆
諸公勉畫平戎策投老深思看太平

和范舍人永康青城道中作

風驅雨壓無浮埃，驂驛千騎東方來。
勝遊公自輩王謝，淨社我亦追宗雷。
岷山樓上一徙倚，如地始闢天初開。
廓然眼界三萬里，山一螳垤水一杯。
世間幻妄幾變滅，正自不滿吾曹咍。
丈夫本願布衣老，達士詎畏蒼顏催。
君看神君歲食羊四萬，一作方處處棄骨高成堆。
西山老翁飽松麪，造物賦予何遼哉。

宿上清宮

永夜寥寥憩上清，下聽萬壑度松聲。
星辰頓覺去人近，

風雨何曾敗月明

是夕山下風雨絕頂月明達曉

早歲文辭妨至道中

年憂患博虛名一菴儻許西峰住常就巢僊問養生

上官

道人巢

居山中

登上清小閣

樓觀參差倚晚晴偶然信脚得閒行欲求靈藥換凡骨
先挽天河洗俗情雲作玉峰時特起山如翠浪盡東傾
何因從此橫空去笙鶴飄然過洛城

小憩長生觀飯已遂行

清絕長生觀再遊疑後身人間空石劫物外自壺春道
士青精飯先生烏角巾回頭增悵望倦馬撲征塵

新津小宴之明日欲遊修覺寺以雨不果呈范舍
人

風雨長亭話別離忍看清淚濕燕脂酒光搖蕩歌雲暖
不似西樓夜宴時

又

新津渡頭船欲開山亭準擬把離盃不如意事十八九

正用此時風雨來

睢州驛舍睡起

平生百無能一嬾每自喜胡爲八年間逐食走萬里身
如盤永轉心似爐丹死事君未免媿富貴不如已雨餘
古驛涼晝寐無錯履澹然得高臥睡思極清美心平了
無夢驚魘何自起尚嫌漆園蝶肯作南柯螳斜陽生木
影龍蛇滿窗紙煎茶儻已熟一笑問童子

送范舍人還朝

平生嗜酒不爲味聊欲醉中遺萬事酒醒客散獨悽然
枕上屢揮憂國淚君如高光那可負東都兒童作北語
常時念此氣生癭況送公歸覲明主皇天震怒賊得長
三年昂星失光芒旄頭下掃在旦莫嗟此大議知誰當
公歸上前勉畫策先取關中次河北堯舜尚不有百蠻
荆楚何能食上國黃扉甘泉多故人定知不作白頭新
因公併寄千萬意早爲神州清塞塵

過魚蛇市小寺

六月苦多雨肩輿走江村過市居人集陟險兵子喧日
暝休野寺汎掃開北軒霧氣如蒼虬夭矯出洞門溪清
見白石糾結菖蒲根遊魚去甚健投餌棄不吞嗟予獨
何爲貪祿忘故園馳驅不自恤面有風沙痕俯仰二十
年竟孤明主恩寄謝衆君子努力蘇元元

眉州作

扁舟久不泛蠶津常恐黃塵解汚人爛醉破除千日懣

予不至眉
山三年矣

狂吟判斷四州春

此行自成都歷永
康唐安至眉山

汀洲漸

歎蘋花老風露初嘗荔子新便欲騎鯨東海去勝遊未
忍別峨岷

過修覺山不果登覽

前日泛江時雨昏失南山今日迎我馬髮鬢擁髻髮白
塔映朱閣間見青林間問我豈忘之揚鞭亟西還西還
亦聊爾行矣來憑欄擾擾紅塵中豈無一日閒會復賔
此詩大書榜其顏但恐厄風雨清遊天所慳

青城縣會飲何氏池亭贈譚德稱

赤日黃塵行路難
青城縣裏得偷閒
十年去國悲霜鬢
六月登樓望雪山
醉客千言猶落筆
美人斗酒未酡顏
憑誰喚住譚夫子
更與徘徊水石間

題菴壁

偶向城南卜草廬
二年浪迹寄樵漁
大牀獨臥豪猶在
萬衆橫行策竟疎
清濁戲分春甕酒
朱黃閒勘夜窗書
衰顏安用頻看鏡
日日元知有不如

幽居

殊方飄泊向誰論
小住僧廬亦所欣
得飽罷揮求米帖
愛眠新著毀茶文
摘蔬籃小霑清露
斲藥鉏輕帶濕雲
從此生涯足幽事
宦遊虛用半生勤

又

剡曲故廬歸未得
暫從地主借茅茨
桃花春水夢不到
菰菜秋風心自知
彊健猶穿幾兩屐
榮華正似一鉤絲
此心炯炯無人會
煙雨蒼茫獨立時

浣溪女

一作浣
花女

江頭女兒雙髻丫常隨阿母供桑麻當戶夜織聲咿啞
地爐豆蔴煎土茶長成嫁與東西家柴門相對不上車
青裙竹笥何所嗟挿髻艷艷牽牛花城中妖姝臉如霞
爭嫁官人慕高華青驪一出天之涯年年傷春抱琵琶
七月八日馬上作

溝水浸新月街槐生碧煙明河七夕後倦馬五門前小
市燈初闌高樓鼓已傳賦詩寬客恨哦罷却淒然

江樓

急雨洗殘瘴江邊閒倚樓日依平野沒水帶斷槎流擣
紙荒村晚呼牛古巷秋腐儒憂國意此際又搔頭

夜登小南門城上

曳杖上江城清宵破二更月回高樹影風壯急灘聲野
艇魚罾舉優場炬火明湖塘正如此回首憶柴荆

予故山在

鏡湖之南

野步至青羊宮偶懷前年嘗劇飲于此

錦官門外曳枯筇此地天教著放翁萬事元無工拙處

一官已付有無中
拏雲栢樹瘦蛟立
繞郭江流清鏡空
欲把酒盃終覺嬾
緩歌曾醉落花風

月夜江濱池納涼

微逕荒城曲叢祠
野水邊月能從我
醉風欲駕人僊靜
看黏螢艸遙聞采
芡船熱官那有此
留滯莫尤天

華亭院僧房

半闔朱門見綠苔
幽花仍倚小山開
劒南七月暑未退
明日更攜棋簞來

又

悠悠馬上困思茶
休歇僧房到日斜
殿背無人綠錢滿
小盆零落珊瑚花

乾明院觀畫

唐年蘭若占閒坊
名畫蕭條半在亡
簌簌踈篁常似雨
陰陰古屋自生涼
入門疊鼓初催講
喚馬斜陽欲滿廊
顯晦熟思真有數
萬金奇跡棄頽牆
院中有黃荃花竹
幾二十壁多已壞
矣

登城

我登少城門四顧天地接大風正北起號怒撼危堞九
衢百萬家樓觀爭岌岌臥病氣壅塞放目意頗愜永懷
河洛間煌煌祖宗業上天祐仁聖萬邦盡臣妾橫流始
靖康趙魏血可蹠急攻寧遠略爲國恃剽劫自量勢難
久外很中已懾籍民備勝廣陞戟畏荆聶誰能提萬騎
大呼去聲擁馬鬣奇兵四面出快若霜掃葉植旗朝受降
馳驛夜奏捷豺虎一朝空荒原何足獵遺民世忠義泣

血受汗脅繫箭射我詩往棧五陵俠

秋日登僊遊閣

馬蹄連早莫車塵細如霧誰知此路邊
高閣下風馭頗傳秋月夕語笑聯杖屨
始知僊與人混迹無異處我來想鸞鶴
稽首祈一顧飛僊不可見惟與白雲遇
白雲如有情侑我欄角住借問何山來
雲驚却飛去

自詠

華髮蕭蕭居士身江頭風雨折烏巾
無人問字尤宜嬾

有吏徵租未是貧
薄宦儻來難倚仗
舊交漸少每酸辛
敲門且復尋僧話
要結他生物外因

雜詠

青羊宮中竹暗天
白馬廟畔栢如山
琴尊處處可消日
車馬紛紛自欠閒

又

石犀廟壩江已回
陵谷一變吁可哀
即今禾黍連雲處
當日帆檣隱映來

又

微風翻翻芋葉白
落日漠漠稻花香
出門縱轡何所詣
萬里橋南追晚涼

又

世事盛衰誰得知
惠陵煙草掩柴扉
陵邊人家叢竹裏
燈火喧呼迎婦歸

大醉歸南禪弄影月下作

昔我變姓名釣魚散花洲
有舩不用楫江急聽自流
即

今客錦城醉過百花樓
天風吹筍輿快若凌空遊
月露浩無際指點隘九州
君看塵土中頗有此樂不題詩
碧玉簡飛僊相畲酬酒醒墮
何處樓臺海山秋

訪楊先輩不遇因至石室

訪客客已去追涼成獨行
衣冠嚴漢殿草木拱秦城
古甃蒼苔滑空庭落日明
出門還憶恍列屋打碑聲

牆東即石

經堂

病酒戲作

新秋風月佳數夕破酒戒飲少輒醉眠衰早頗自怪高
齋未離枕眩轉疑屋壞家人具雞豚熟視不能噉尚無
千里尊敢覓鏡湖蟹一盃苦蕒齋價直娑婆界

訪昭覺老

久矣耆年罷送迎喜聞革履下堂聲遊山笑我驀直去
過夏憐君太瘦生庭際楠陰凝晝寂牆頭鵲語報秋晴
功名已付諸賢了長作閒人樂太平

晝臥

秋暑侵人氣力微燒香高枕掩齋扉弄姿野鷲晴猶斂
作態江雲晚未歸身外極知皆夢事世間隨處有危機
故山松菊今何似晚矣淵明悟昨非

晚步江上

萬里橋邊帶夕陽隔江漁市似清湘山林獨往吾何恨
車馬交流渠自忙高柳陰中扶拄杖平沙穩處據胡牀
故人京國無消息安得相攜共此涼

夜坐

大風橫吹斗柄折迅雷下擊山壁裂放翁閉戶寂不聞
楞嚴卷盡燈花結

夜行

紅藤拄杖扶衰病村北村南破夜行閒繞長堤逐螢火
戲臨荒沼問鼃聲倦遊但有笭筍興久客真語襴襪情
安得故人同一醉三更城上看河傾

悲秋

一拋蓑笠雪溪舟八載梁州復益州纔破繁華海棠夢

又驚搖落井梧秋曉班無復趨行殿晚境惟思老寢丘
病肺經旬疎酒盞愁來惟是上南樓

城北青蓮院方丈壁間有畫鶯子者過客多題詩
予亦戲作二絕句

一雙掠水鶯來初萬點飛花社雨餘辛苦成巢君勿笑
從來吾亦愛吾廬

又

明窗短壁拂蛛絲常是江邊送客時留滯錦城生白髮

不如巢鷺有歸期

睡起

閒身喜午睡睡起日猶早茂竹青入簷幽花紅出草苔
錢亦滿砌護惜不忍掃宦情本自疎此地可忘老

天涯

天涯到處自生愁游子征塵暗弊裘燈火青熒五門夜
風煙索莫二江秋帝城漫誦新詩句客路難逢舊輩流
送老把茅須早決此生何止四宜休

暇日行城上同行追不能及

疾步登城殊未衰欣然一笑擲筇枝正當閒似白鷗處
不減健如黃犢時秋野煙雲橫慘淡暮天樓閣倚參差
高吟醉舞忘歸去乞與丹青畫怪奇

感秋

西風繁杵擣征衣客子關情正此時萬事從初聊復爾
百年彊半欲何之畫堂蟋蟀怨清夜金井梧桐辭故枝
一枕淒涼眠不得呼燈起作感秋詩

雙流旅舍

孤市人稀冷欲冰昏昏一盞店家燈開門拂榻便酣寢
我是江南行脚僧

又

西風黃葉滿江村瘦馬來穿渡口雲動地傳呼逢醉尉
誰何禁殺故將軍

又

每因髀肉歎身閒聊欲勤勞鞍馬間黑稍黃旗端未免

會衝風雪出榆關

早行至江原

喔喔鳴雞促起程
翻翻飛鷺導孤征
旄盡落歸猶遠
帶眼頻移瘦自驚
小市蕭條黃葉滿
斷橋零落綠苔生
居人猶復多愁思
何況天涯倦客情

安仁道中

千古臨邛路飄然偶獨遊
病身那迫老遠客更禁秋
水退橋未葺渡閒船自流
飛騰付年少回首思悠悠

又

三驛未爲遠
衰翁愁出門
貪程多卒卒
失睡每昏昏
天
大圍平野江
回隔近村
何時有餘俸
小築占雲根

八月十四夜三义市對月

去年看月籌邊樓
雲罅微光如玉鉤
主人不樂客歎息
清歌空送黃金舟
今年看月三义市
纖雲不作良宵崇
素娥命駕洗客愁
我亦傾杯邀共醉
風露萬里方渺然
冰輪無轍行碧天
盈盈耿耿意無盡
月不忍落人忘眠

一言欲報廣寒殿茅簷華屋均相見
明年萬事不足論
但願月滿人常健

豐橋旅舍作

我本山林人心期在塵表出門消底物
兩屨萬事了羣
兒何足愠爲爾常悄悄今朝山中路
更喜相識少三义
市人醉爭席豐橋逆旅留饋食
小婦梳髻高一尺梭聲
札札當戶織

文君井

落魄西州泥酒盃酒酣幾度上琴臺青鞋自笑無羈束

又向文君井畔來

相如琴臺在成都城中文君井在邛州相傳爲卓氏故宅

白鶴館夜坐

竹聲風雨交松聲波濤翻我坐白鶴館燈青無晤言廓
然心境寂一洗吏卒喧袖手哦新詩清寒愧雄渾屈宋
死千載誰能起九原中間李與杜獨招湘水魂自此競
摹寫幾人望其藩蘭茗看翡翠煙雨啼青猿豈知雲海
中九萬擊鵬鵬更闌燈欲死此意與誰論

南津勝因院亭子

南江平無風如鏡新拂拭漁舟不點破潏潏千頃碧
蘭干西北角雲散山爭出坡陀競南走翠入窗戶窄江山
不世情作意娛此客豈無尊中酒豪飲非宿昔明當還
成都塵土埋馬跡後巖在眼中飛去無羽翼

後巖在鳳凰山後七

八里山水
尤奇絕

登邛州譙門門三重其西偏有神仙張四郎畫像
張蓋隱白鶴山中

浮雲在脚底千里在眼邊攀躋忽至此倚柱眩欲顛車
馬細如螳紛紛衢路間嗟汝何爲者馳驅窮歲年我本
澹蕩人此心實愛閒向來出處際不愧咫尺天風吹哦
詩聲十里搖西山懸知老僊翁爲我一粲然

書寓舍壁

天與癡頑不解愁未埋病骨且閒遊山於拄杖橫時看
路到芒屨破處休初擬燒丹住南嶽却因學劍客西州
秋風巾褐添蕭爽又作臨邛十日留

又

落佩顏冠慣放慵經旬寓館古臨邛西偏取路橫穿竹
北向開門倒看松醉後蹇驢歸薄暮閒來支枕睡高春
鵲鳴山谷曾遊處剩欲扶犁學老農

鵲鳴一名鶴鳴
在邛之大邑縣

次韻使君吏部見贈時欲遊鶴山以雨止

暮頤江上約同行白鶴峯前辱寄聲青史功名男子事
後堂歌舞故人情午甌誰致葉家白春甕旋撥郎官清
登覽不嫌鳩喚雨十年芒屨慣山程

西巖翠屏閣

把酒孤亭半日留
西巖獨擅鶴山秋
也知絕境終難賦
且喜閒身得縱遊
鶻起危巢時磔磔
鹿鳴深澗莫呦呦
人生適意方爲樂
甲第朱門祇自囚

幽居院

久墮塵沙裏
幽尋始此行
侵雲千嶂合
披草一僧迎
蘇潤泉時滴
崖傾竹倒生
登高忽平曠
回首失崢嶸
老矣猶孤客
歸哉念耦耕
結廬殊未定
此地頗關情

中溪

散人無俗事日日山中行今朝中溪寺妙絕不可名幽
處萬木合忽然千頃平綠黛染晴嶂白雲如玉城巖花
勸小酌天風吹獨醒雖無九臯鶴奇哉此松聲我如折
翼鵬回盡九萬程脫屣擲拄杖於此餞餘生

天台院有小閣下臨官道予爲名曰玉霄

竹輿衝雨到天台綠樹陰中小閣開牖作玉霄君會否

要知散吏按行來

予所領崇道觀蓋在天台山中五霄峯下

山中小雨得字文使君簡問嘗見張僊翁乎戲作

一絕

張僊挾彈知何往清嘯穿林但可聞拾得鐵丸無處用

爲君打散四山雲

張四郎常挾彈視人家有災疾者輒以鐵丸擊散之

雨中山行至松風亭忽澄霽

煙雨千峯擁髻鬟忽看青嶂白雲間卷藏破墨營丘筆
却展將軍着色山

贈宋道人

我不如昔人騎鶴上九天玉簡奏事虛皇前平生嗇養
氣麤全兩脚馳走輕如煙烏道懸崖忽飛騫戲擲短劍
聲鏗然轉盼跳下千仞淵已復取劍升層巔騰猿俊鶻
爭後先飢食松花掬飛泉金骨綠髓漸凝堅口哦七字
黃庭篇西來欲訪挾彈僊丹經劍訣更精研嗟哉一失
五百年作詩付子勿妄傳

自山中泛舟歸郡城

我呼小艇浮南津落日亂山銜半輪背舩雙鷺低掠水

下灘峭風冷逼人中流回望始太息煙中白塢高嶙峋
適從彼來忽在此老夫拄杖捷有神尉曹堆盤笠澤膾
秀才瀉榼中山春豈惟外物不挂眼醉後兀爾忘吾身
朝冠行即挂神武買犢遂欲耕我岷金丹自喜日日長
白髮未許年年新擁橋炬火遠已開歸舍睡息清而勻
明朝笑謂同載客有脚莫踏東華塵

次韻宇文使君山行

城中望西山爽氣固可致不如山中行衣屨染濃翠使

君資高逸鐵馬奏橫吹平郊何曠蕩修竹亦清閔既聞
蘇門嘯遂挹浮丘袂似嫌太清絕開宴盡主意戲留楚
臺雲寶靨鬪姿媚珠貫按歌聲泉湧發詩思歸來殊不
倦吏牘閱千紙却笑江左人把酒輒遺事下客亦未衰
尚可提萬騎安能學胡公危苦寄鶴翅

仙人胡安學道
西巖跨鶴上昇

山以此
得名

同王無玷羅用之訪臨邛道士墓

樂天詩句本嘲詆那有人從碧海來五百年間逢好事

披榛來訪此崔嵬

登太平塢

我從平地來忽寄百尺巔
眼力與脚力初不減少年漸
高山愈出杳杳浮雲煙
舉手捫參旗日月磨螭旋
天風忽吹衣便欲從此僊
且復下梯去著書未終篇

中夜投宿修覺寺

陸走崔嵬水下瀧
客中更復客它邦
晚離方井雲藏市
夜渡新津火照江
人語紛紛投野寺
牀敷草草寄僧窗

五更風雨妨歸夢臥看殘燈吐半缸

絕勝亭

蜀漢羈遊歲月侵京華乖隔少來音登臨忽據三江會
飛動從來萬里心地勝頓驚詩律壯氣增不怕酒盃深
一琴一劔白雲外揮手下山何處尋

雲溪觀竹戲書

氣蓋冰霜勁有餘江邊見此列僊癯清寒直入人肌骨
一點塵埃住得無

又

溪光竹色兩相宜
行到溪橋竹更奇
對比莫論無肉瘦
閉門可忍十年飢

九月十日如漢州小獵於新都彌年之間投宿民家

適從邛州歸又作漢州去天低慘欲雪遊子悲歲莫十年辭京國疋馬厭道路野火炎高岡江雲暗空戍角弓寒始勁霜鶻飢更怒邂逅成小獵尺箠聊指呼北連武

侯祠南並稚子墓合圍感窮鹿設伏截狡兔壯哉帶箭
雉耿介死不顧吾寧暴天物戰法因得寓黃昏過民家
休馬燎裘袴割鮮盛燔炙毛血灑庭戶老姥亦復奇汎
掃邀我駐丈夫儻未死千金酬此遇

獵罷夜飲示獨孤生

客途孤憤只君知不作兒曹怨別離報國雖思包馬革
愛身未忍價羊皮呼鷹小獵新霜後彈劒長歌夜雨時
感慨却愁傷壯志倒瓶濁酒洗餘悲

又

關輔何時一戰收
蜀郊且復獵清秋
洗空狡穴銀頭鶻
突過重城玉腕騶
賊勢已衰真大慶
士心未振尚私憂
一樽共講平邊策
勿爲飛鳶念少游

又

白袍如雪寶刀橫
醉上銀鞍身更輕
帖草角鷹掀兔窟
憑風羽箭作鴟鳴
關河可使成南北
豪傑誰堪共死生
欲疏萬言投魏闕
燈前攬筆涕先傾

自廣漢歸宿十八里草市

月黑叩店門燈青坐牀簣飯麤雜沙土菜瘦等草棘泰
然均一飽未覺異玉食我豈兒女哉口腹爲怨德古人
恥懷祿不仕當力穡從今扶犁手終老謝翰墨

東郊飲村酒太醉後作

丈夫無苟求君子有素守不能垂竹帛正可死隴畝邯
鄲枕中夢要是念所有持枕與農夫亦作此夢否今朝
櫟林下取醉村市酒未敢羞空囊爛漫詩千首

九月十八夜夢避雨叩一僧院有老宿年八十許
邀留甚勤若舊相識者夢中爲賦此詩

畫簷急雨傾高秋夜投丈室燈幽幽耆年擁毳雪滿頭
拂拭牀敷邀我留雛猊戲擲香出喉蓬蓬結成蒼玉毬
蠻童揭簾侍者憂觸散香煙當罰油

秋晚登城北門

幅巾藜杖北城頭卷地西風滿眼愁一點烽傳散關信
兩行雁帶杜陵秋山河興廢供搔首身世安危入倚樓

橫梁賦詩非復昔夢魂猶繞古梁州

劔南詩豪卷八



總校官庶吉士臣張能照
校對官編修臣楊壽楠
謄錄監生臣戴 埏